

NO. SOALAN: 16

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : TUAN CHONG CHIENG JEN
[BANDAR KUCHING]**

TARIKH : 25 NOVEMBER 2014

RUJUKAN : 7244

SOALAN:

Tuan Chong Chieng Jen [Bandar Kuching] minta **MENTERI DALAM NEGERI** menyatakan apa sebabnya kegiatan perjudian internet (atau perjudian mesin kuda) masih berleluasa di Sarawak. Apakah langkah-langkah yang telah diambil oleh pihak Polis untuk memerangi kegiatan tersebut dan apa sebabnya langkah-langkah itu tidak berkesan.

JAWAPAN:

Tuan Yang di-Pertua,

Pihak Kementerian dan Polis Diraja Malaysia (PDRM) memandang serius isu-isu berkaitan perjudian haram terutama yang melibatkan penggunaan internet di seluruh negara. PDRM sentiasa memantau dan menjalankan operasi secara terancang dan berterusan dalam menangani masalah ini yang dijalankan oleh orang-orang perseorangan dan juga sindiket yang boleh menjejaskan imej negara.

Statistik tindakan yang diambil terhadap pusat perjudian haram di Sarawak pada tahun 2014 (sehingga 23 November 2014) yang mana pihak Polis telah melakukan sejumlah 4,566 serbuan dan telah menangkap seramai 2,511 orang penganjur dan pemain serta merampas sejumlah 11,528 buah komputer. Dalam tempoh yang sama juga sejumlah 916 kertas siasatan telah dibuka dan 413 orang telah dituduh di Mahkamah.

Bagi menentukan aktiviti perjudian dapat ditangani dengan lebih berkesan dan terancang, Kementerian akan terus mengambil pendekatan dan langkah-langkah seperti berikut:-

- i) Memperhebatkan tindakan yang tegas bagi pembenterasan kegiatan mesin perjudian berkomputer dengan tumpuan dan skala yang lebih besar di seluruh negara termasuk**

melancarkan Ops Dadu Khas pada 26 Oktober 2014 di seluruh negara.

- ii) Kementerian telah menubuhkan pasukan khas di peringkat Bukit Aman bagi membasmi masalah perjudian secara lebih berkesan. Penubuhan pasukan khas dengan kekuatan seramai 200 pegawai dan 30 kakitangan awam akan membuat serbuan dan pemeriksaan pusat-pusat yang menganjurkan perjudian di seluruh negara. Pasukan khas yang dikenali sebagai *Skuad Taktikal Khas 3* (perjudian, maksiat dan kongsi gelap) dijangka akan mula beroperasi pada bulan Disember ini.
- iii) Pihak Kementerian telah menyediakan satu nota makluman dalam mesyuarat Menteri Besar dan Ketua Menteri tentang keperluan tindakan bersepadu antara pihak Berkuasa Tempatan (PBT) dengan pihak PDRM untuk mengekang kegiatan perjudian memandangkan pihak PBT mempunyai budi bicara bagi meluluskan dan membatalkan premis dan lesen untuk perniagaan “*cybercafé*” di kawasan pentadbiran masing-masing.
- iv) Kerjasama dengan pihak Tenaga Nasional Berhad (TNB) dan pihak pembekal air akan dipertingkatkan lagi untuk tindakan permotongan bekalan elektrik dan bekalan air terhadap premis yang degil dan masih mengulangi kesalahan yang sama.

- v) Pihak Kementerian sedang mengkaji tindakan alternatif akan diambil di bawah Undang-Undang Pencegahan Jenayah (POCA) jika tiada keterangan yang kukuh untuk di tuduh di mahkamah terhadap individu atau sindiket yang menganjurkan perjudian haram.

Antara faktor yang menghalang aktiviti perjudian tidak dapat dihapuskan sepenuhnya disebabkan faktor berikut:-

- i) Pelayan (*Server*) berada di luar negara. Kegiatan ini sudah menjadi jenayah rentas sempadan di mana ianya melibatkan jaringan dengan laman sesawang luar negara. Pelayan (*server*) perjudian ini biasanya dikesan berada di luar negara seperti Filipina, Vietnam & Kemboja. Disamping itu pengendali laman sesawang perjudian menggunakan teknologi terkini dan canggih termasuk menggunakan sistem kawalan yang tinggi seperti nama pengguna dan kata laluan. Nama pengguna dan kata laluan juga sering ditukar bagi menyukarkan pihak polis mendapatkan keterangan.
- ii) Pusat perjudian bertopengkan pusat hiburan keluarga Terdapat Pusat Hiburan Keluarga (PHK) yang dikeluarkan lesen oleh Pihak Berkuasa Tempatan (PBT) telah disalahgunakan dengan menganjurkan

perjudian. Pusat Hiburan Keluarga membayar wang tunai sebagai ganti kepada hadiah dalam sesuatu permainan mesin simulator. Perkara ini telah menimbulkan percanggahan antara bidangkuasa PBT dengan pihak polis untuk menguatkuasakan undang-undang Akta Rumah Judi Terbuka 1953.

iii) Kos yang rendah.

Kos untuk menjalankan aktiviti perniagaan ini adalah tidak tinggi, justeru itu sindiket masih mampu meneruskan kegiatan mereka walaupun pihak berkuasa mengambil tindakan rampasan keatas mesin perjudian berkomputer.

iv) Penggunaan alat kawalan jauh.

Dalam serbuan-serbuan kegiatan perjudian mesin komputer, pihak sindiket telah menggunakan alat kawalan jauh untuk menutup atau menukar laman perjudian kepada laman sesawang sosial atau menutup bekalan elektrik dalam premis berkenaan. Semua data telah dipadamkan dan sukar bagi pihak forensik dan pakar judi untuk mengesahkan atau mengeluarkan semula data bagi membuktikan kewujudan unsur perjudian dalam komputer berkenaan.

Usaha dan tindakan yang diambil oleh Polis melalui operasi (Ops Dadu) yang dilakukan secara agresif dan berterusan dilihat dapat mengekang gejala ini dari terus berlaku, namun demikian usaha ini tidak akan berjaya sepenuhnya tanpa ada penglibatan daripada orang ramai dalam menyalurkan maklumat kepada pihak Polis di samping orang ramai perlu menghindari aktiviti yang tidak sihat ini. Aktiviti perjudian akan terus wujud jika ada permintaan daripada pemain.

**MESYUARAT KETIGA, PENGGAL KEDUA
PARLIMEN KETIGA BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATUK RAIME BIN UNGGI
[TENOM]**

TARIKH : 25 NOVEMBER 2014, SELASA

SOALAN : 17

Minta MENTERI KEMAJUAN LUAR BANDAR DAN WILAYAH menyatakan jumlah usahawan Bumiputra di Sabah yang terkesan dengan bantuan Majlis Amanah Rakyat (MARA) selama ini terutama dalam bidang Perusahaan Kecil dan Sederhana (PKS).

JAWAPAN :

Yang Di-Pertua,

Jumlah usahawan Bumiputera di Sabah yang menerima kemudahan Majlis Amanah Rakyat (MARA) sepanjang RMKe-10 (2011 sehingga September 2014) adalah seperti berikut :

- i. Program pewujudan, pembudayaan dan peningkatan keusahawanan – 8,616 usahawan mendapat kemudahan melalui 135 program/kursus.
- ii. 4,140 usahawan mendapat kemudahan pembiayaan perniagaan MARA dengan jumlah kelulusan sebanyak RM398,367,200.
- iii. 332 premis perniagaan MARA disewakan kepada usahawan di negeri Sabah.